

INFORMACIJA

**o aktivnostima u postupku izdavanja Energetske dozvole za izgradnju VE
Debelo brdo privrednog društva KONCIG d.o.o. Posušje**

septembar/2015.

INFORMACIJA

o aktivnostima u postupku izdavanja Energetske dozvole za izgradnju VE Debelo brdo privrednog društva KONCIG d.o.o. Posušje

Uvod:

Svrha ove informacije je da informiše Parlament Federacije Bosne i Hercegovine o poduzetim aktivnostima koje provodi privredno društvo KONCIG d.o.o. Posušje u postupku pribavljanja neophodne dokumentacije, za izgradnju VE Debelo brdo na lokalitetu Općine Kupres.

Prema Strateškom planu i programu razvoja energetskog sektora Federacije Bosne i Hercegovine, izgradnja proizvodnih objekata na bazi vjetroenergije je važan segment korištenja obnovljivih izvora energije, što u proizvodnji električne energije predstavlja ekološki čistu proizvodnju. Korištenjem vjetroenergije, kao energetskog primarno obnovljivog resursa, značajno bi se povećao udio proizvodnje električne energije u Federaciji BiH, iz obnovljivih izvora energije.

U skladu sa Ugovorom o osnivanju Energetske zajednice i usvajanjem Odluke o implementaciji EU Direktive 2009/28 za Federaciju BiH, utvrđen je obvezujući cilj da osigura 41% udjela OIE u potrošnji električne energije u 2020. godini, dok je udio energije iz OIE u potrošnji iznosio 36% u 2009. godini.

Za realizaciju projekta VE Debelo brdo potrebna su investicijska sredstva od 150 milijuna KM, što je osigurano privatnim kapitalom u 100%-tnom iznosu. Od realizacije ovoga projekta znatnu će korist imati šira i lokalna zajednica kojima će pripadati ugovorni iznos 2,5 % od koncesijske rente od proizvedene električne energije. Prema ugovoru o koncesiji s Općinom Kupres, prilikom sredstava od poreza na dobit će se puniti budžet Federacije BiH. Lokalna zajednica će imati značajan interes u zapošljavanju domaće radne snage i maksimalno korištenje domaćih resursa u izgradnji i tokom eksploatacije ovoga projekta kao i korištenje vjetroenergije u turističke svrhe.

- A. Hronologija aktivnosti u realizaciji projekta izgradnje VE Debelo brdo
- B. Status projekta izgradnje VE Debelo brdo
- C. Prijedlog zaključka.

A. Hronologija aktivnosti u realizaciji projekta izgradnje VE Debelo brdo

Razvoj projekta VE Debelo brdo je započeo 2006.godine određivanjem lokacije na području općine Kupres, a sve na osnovu stručnih procjena i podataka o kvaliteti vjetroenergije na tom lokalitetu. Nakon izglednih mogućnosti dobijanja koncesije za koncesiono područje, prema Zakonu o koncesijama Kantona 10, 21.06.2006. godine, ishodišna je dozvola za mjerenje vjetroenergije. Mjerenje vjetroenergije na 50 m visine u trajanju 13 mjeseci i na visini 30 m u trajanju 9 mjeseci, izvršilo je privredno društvo „Dvokut“ d.o.o. Sarajevo sa opremom NRG System USA. Kalibraciju i certifikaciju mjerne opreme je izvršio Otech Engineering Inc iz Kalifornije i Theis Klima iz Njemačke. Paralelno aktivnostima mjerenja vjetroenergije, izrađena je predstudija izvodljivosti i ekonomske opravdanosti projekta izgradnje VE Debelo brdo, investitora KONCIG d.o.o. Posušje.

Početkom 2008. godine Općinsko vijeće Kupres je donijelo prostorni plan s označenim lokalitetima za izgradnju vjetroelektrana na području svoje općine. VE

Debelo brdo je službeno uvedena u Indikativni plan izgradnje novih energetskih objekata u Federaciji BiH 2008. godine.

Shodno Zakonu o koncesijama Županije 10, privredno društvo KONCIG d.o.o. Posušje je potpisalo ugovor o koncesiji 23.12.2008. godine, a 31.03.2010. godine potpisan je ugovor s OV Kupres o korištenju zemljišta.

Nakon donošenja Uredbe OIEiEK od 10.06.2010. godine, izrađena je studija uticaja VE Debelo brdo na okoliš, poslije čega je kompletiran zahtjev za Okolišnu dozvolu, a ista je izdata 23.10.2010. godine.

S Okolišnom dozvolom, upisom projekta VE Debelo brdo u Registar OIE u fazi izgradnje, s izrađenim Idejnim projektom i potrebnim saglasnostima i neophodnom dokumentacijom 19.09.2011.g. kompletiran je zahtjev za Lokacijsku dozvolu (Urbanističku suglasnost), a ista je izdata 07.10.2011. godine s klauzulom pravosnažnosti od 15.08.2011.godine.

Dana 20.10.2011. godine podniet je zahtjev za izdavanje Načelne saglasnosti za priključenje VE Debelo brdo instalisane snage 54,6 MW kod Elektroprijenosa BiH a.d. Banja Luka.

Polovinom 2012. godine na osnovu indikativnog plana razvoja i provedene rasprave svih elektroenergetskih subjekata vezanih za problematiku priključenja VE i drugih proizvođača električne energije iz OIE na prenosnu mrežu, NOS BiH je izradio, DERK prihvatio, a Federalno ministarstvo energije, rudarstva i industrije je usaglasio mogućnost priključenja novoizgrađenih elektroenergetskih objekata na prijenosnu mrežu u BiH. Od ugovorenih 350 MW instalirane snage vjetroelektrana u Bosni i Hercegovini za Federaciju BiH je predviđeno 230 MW, a 120 MW za RS.

Načelna saglasnost za priključenje VE Debelo brdo na prijenosnu mrežu data je 19.10.2012.godine, te prema propisanim uvjetima priključka i Projektom zadatku koje je odredio NOS BiH, izrađen je elektrotehnički elaborat priključka VE Debelo brdo na prenosnu mrežu. Reviziju elaborata i izdavanje Certifikata za priključak VE Debelo brdo izradio je i izdao NOS BiH 14.12.2014. godine.

Uredbom OIEiEK od 10.06.2010.godine bilo je propisano da se nakon dobivene dozvole za građenje podnese zahtjev za Energetsku saglasnost. Rukovodeći se tom važećom Uredbom OIEiEK, investitor je izradio sve glavne projekte građevinski, arhitektonski, mašinski i elektrotehnički s priključkom i s rasklopnim postrojenjem. Izvršena je revizija i potrebna nostrifikacija glavnih projekata, investitor je izradio sve potrebne elaborate priključka, protivpožarne zaštite, zaštite na radu, zbrinjavanja otpada i geomehanički elaborat (misija G 21). Kod nadležnog zemljišnoknjižnog suda investitor je uknjižio na privredno društvo KONCIG d.o.o. Posušje, pravo korištenja potrebnog zemljišta za izgradnju vjetroturbina i pristupnih puteva.

Dana 08.08.2012. godine investitor je podnio zahtjev za izdavanje dozvole za građenje, naknadno je zahtjev dopunjen s Načelnom saglasnosti priključka i s drugom dokumentacijom, shodno zahtjevima Federalnog ministarstva prostornog uređenja. KONCIG d.o.o. Posušje je krajem marta 2014. godine konačno kompletirao zahtjev za dozvolu za građenje projekta VE Debelo brdo, nakon čega je od Federalnog ministarstva prostornog uređenja investitor je obavješten da se zahtjev za građenje mora povući, zbog donošenja i primjene Zakona o električnoj energiji u Federaciji Bosne i Hercegovine („Službene novine Federacije BiH“, broj 66/13) i Uredbe o postupku, kriterijima, formi i sadržaju zahtjeva za izdavanje energetske dozvole za izgradnju novih i rekonstrukciju postojećih proizvodnih postrojenja ("Službene novine Federacije BiH", broj 27/14) kojima je propisano da za izdavanje odobrenja za građenje (građevinske dozvole) investitor treba da pribavi Energetsku dozvolu.

Privredno društvo KONCIG d.o.o. Posušje je 21.05.2014. godine povukao zahtjev za građenje (građevinske dozvole) kod nadležnog Ministarstva, sa zapisnikom i krenuo u postupak pribavljanja Energetske dozvole, odnosno podnio zahtjev za

izdavanje Energetske dozvole kod Federalnog ministarstva energije, rudarstva i industrije čija je to i nadležnost.

Ostvarene aktivnosti:

- Vjetropotencijal: izvršeno mjerenje vjetropotencijala,
- Ugovori: o koncesiji, o izgradnji i korištenju zemljišta i s Investitorom,
- Obuhvat: registriranje obuhvata za VE Debelo brdo u Prostornom planu,
- Studije: izvodljivosti, vjetropotencijala, utjecaja na okoliš i dr,
- Projekti: Idejni i Glavni,
- Saglasnosti: Vodna, Arheološka, Elektroprivredna, PTT, Lokalne ceste, Priključka na EES, Prenamjena zemljišta, Zbrinjavanje otpada i VTG 3 MW,
- Elaborati: priključka, geotehnički, protupožarni i zaštite na radu,
- Registri: Registar OIE i Certifikat priključka,
- Dozvole: Mjerenje vjetra, Okolišna i Lokacijska (Urbanistička),
- Zemljište: upis na nadležnom sudu vlasničkih i katastarskih čestica zemljišta za izgradnju VE Debelo brdo u korist društva Koncig doo,
- Ponude: opreme vjetroelektrana.

Planirane aktivnosti:

- Ishođenje Energetske dozvole,
- Ishođenje Građevinske dozvole,
- Izvršiti testiranje proizvodnje,
- Ishođenje Upotrebne dozvole,

Dopremanje opreme i početak izgradnje očekuje se polovicom iduće 2016. godine, a završetak izgradnje i puštanje u pogon VE Debelo brdo očekuje se krajem 2016. godine ili početkom 2017. godine.

B. Status projekta izgradnje VE Debelo brdo

U postupku pribavljanja odobrenja za građenje, građevinske dozvole, za izgradnju novih i rekonstrukciju postojećih elektroenergetskih objekata investitori trebaju ishoditi Energetsku dozvolu. "Energetska dozvola" je upravni akt koji izdaje Federalno ministarstvo energije, rudarstva i industrije investitoru u postupku dobivanja potrebnih dozvola za izgradnju proizvodnog elektroenergetskog objekta.

Po odredbama člana 78. st. (3) i (6) Zakona o električnoj energiji u Federaciji Bosne i Hercegovine („Službene novine Federacije BiH“, broj: 66/13) i člana 23. stav (3) Uredbe o postupku, kriterijima, formi i sadržaju zahtjeva za izdavanje energetske dozvole za izgradnju novih i rekonstrukciju postojećih proizvodnih postrojenja ("Službene novine Federacije BiH", broj: 27/14), propisano je da za izgradnju novih i rekonstrukciju postojećih proizvodnih elektroenergetskih objekata, koji su iz nadležnosti Federacije BiH i čija je instalisana snaga veća od 30 MW, Energetsku dozvolu izdaje Federalno ministarstvo energije, rudarstva i industrije uz prethodno pribavljenu saglasnost Vlade Federacije BiH i Parlamenta Federacije BiH.

Privredno društvo KONCIG d.o.o. Posušje postupilo je po članu 16. Uredbe, dostavilo svu traženu dokumentaciju, u originalu ili ovjerenj kopiji koja nije starija od 60 dana. Privredno društvo KONCIG d.o.o. Posušje, između ostalog dostavilo je i sljedeću dokumentaciju:

- Urbanistička saglasnost, broj: UPI/03-23-2-159/14 MT od 06.06.2014.godine, izdata od Federalnog ministarstva prostornog uređenja,

- Okolinska dozvola, broj: UPI 05/2-3-23-5-92/10 SS od 23.09.2010. godine, izdata od Federalnog ministarstva okoliša i turizma,
- Vodna saglasnost, broj: UP/40-1/25-3-71/14 od 22.04.2014.godine, izdata od Agencije za vodno područje Jadranskog mora Mostar,
- Uvjeti za priključak korisnika na prenosnu mrežu br. 09/14, broj: 01-9807/14 od 30.07.2014. godine izdati od Elektroprenosa BiH,
- Izjava o prihvaćanju uvjeta za priključak korisnika na prijenosnu mrežu, potpisana od strane korisnika 06.08.2014. godine,
- Certifikat priključenja proizvodnog elektroenergetskog objekta u skladu sa zahtjevima Projektnog zadatka kojim se potvrđuje da je VE „Debelo brdo“, KONCIG d.o.o. Posušje ispunila sve neophodne zahtjeve NOS BIH-a, Cert.br. 16-2014, broj: 3445/14 od 09.12.2014. godine, izdat od strane NOS BiH,
- Ugovor o koncesiji na korištenje prostora za izgradnju vjetroparka u cilju proizvodnje električne energije na lokalitetu Debelo brdo i Turska mala u općini Kupres, broj: 05-01-18-294/08 od 07.05.2010. godine potpisan od strane Hercegbosanske županije, Ministarstvo gospodarstva, kao „Koncesor“, kojeg zastupa Ministar Vlatko Zrilić i „Koncesionara“ KONCIG d.o.o. Posušje, kojeg zastupa direktor Josip Grubišić,
- Aneks Ugovora na koncesiju: Aneks br. 1, od 15.09.2014. godine,
- Aneks br.2, od 06.10.2014. godine,
- Aneks br.3, od 14.05.2015. godine,
- Aneks br.4, od 18.05.2015. godine,
- Aneks br.5, od 15.06.2015. godine,
- Aneks br.6, od 29.06.2015. godine i
- Aneks br.7, od 13.07.2015. godine,
- Potvrda broj: 02-05/1-31-1-7-742.1/15 od 15.06.2015. godine,
- Potvrda broj: 02-05/1-31-1-7-742.2/15 od 15.06.2015. godine,
- Rješenje općinskog suda Livno, Odjeljenje suda Tomislavgrad, zemljišnoknjižni ured br. 068-2-Dn-14-000617 od 09.10.2014. godine,
- Aneksom od 06.10.2014. godine, odobrava se upis zabilješke koncesije u kolonu Upisi B lista, Potvrdu o pložaju turbina sa pripadajućim zemljištem po katastarskim česticama a u skladu sa glavnim projektom, broj:05/2-30-2-82/14 od 23.04.2014 godine, izdatu od Službe za opću upravu, društvene djelatnosti, imovinsko pravne poslove, katastar i geodetske poslove općine Kupres,
- Potvrdu o pložaju puteva u obuhvatu Debelo brdo do vjetroturbina sa pripadajućim zemljištem po katastarskim česticama a u skladu sa glavnim projektom, broj:05/2-30-2-82/14 od 23.04.2014 godine, izdatu od Službe za opću upravu, društvene djelatnosti, imovinsko pravne poslove, katastar i geodetske poslove općine Kupres.

Vlada Federacije Bosne i Hercegovine je na svojoj 156. sjednici donijela Odluku o davanju prethodne saglasnosti za izdavanje Energetske dozvole privrednom društvu KONCIG d.o.o. Posušje, V.broj: 397/2015 od 18.03.2015. godine, ("Službene novine Federacije BiH", broj: 24/15).

Projekat izgradnje vjetroelektrane „Debelo brdo“, planiran je i uvršten u Strateški plan i program razvoja energetskog sektora Federacije BiH. Područje oko Kupresa, Livna i Tomislavgrada, zbog značajnog resursa vjetro potencijala, predviđeno je za izgradnju vjetroelektrana. Akcionim planom do 2020. godine predviđena je izgradnja vjetroelektrana ukupno instalisane snage do 230 MW u Federaciji BiH. Ministarstvo je zaključcima Vlade Federacije, V. broj: 1063/2014 od 05.06.2014. godine, odredilo da će dati prethodnu saglasnost za priključak na prijenosnu mrežu novih vjetroelektrana ukupno instalisane snage do 103 MW, od čega je za investitora JP „Elektroprivreda HZ HB“ d.d. Mostar za vjetroelektranu „Mesihovina“, instalisane snage do 55 MW i investitora JP Elektroprivreda BiH d.d. Sarajevo za vjetroelektranu „Podveležje“,

instalirane snage 48 MW. Za preostalu raspoloživu instaliranu snagu do 127 MW, uz prethodnu saglasnost za priključak na prijenosnu mrežu za vjetroelektrane, dodjeliti će se onim investitorima koji prvi dostave Ministarstvu dokaze o ispunjenju svih uvjeta iz zaključaka Vlade Federacije BiH.

Vlada F BiH je 18.03.2015.g. dala prethodnu suglasnost Federalnom ministarstvu energije, rudarstva i industrije za izdavanje Energetske dozvole privrednom društvu KONCIG d.o.o. Posušje za izgradnju vjetroelektrane VE Debelo brdo na Kupresu instalirane snage 54 MW (18 VTG x 3 MW).

Ministarstvo je pribavilo prethodnu saglasnost Vlade Federacije Bosne i Hercegovine V. broj: 397/2015 od 18.03.2015. godine, („Službene novine Federacije BiH“, broj: 24/15) kojom je određeno da će Vlada Federacije BiH informisati Parlament Federacije BiH o aktivnostima u postupku izdavanja Energetske dozvole za izgradnju vjetroelektrane „Debelo brdo“ i zatražiti od Parlamenta Federacije BiH prethodnu saglasnost za izdavanje Energetske dozvole privrednom društvu KONCIG d.o.o. Posušje, kako bi Ministarstvo moglo dalje provoditi postupak izdavanja Energetske dozvole.

C. Prijedlog zaključka

Postupajući po zaduženju iz tačke III. Odluke Vlade Federacije Bosne i Hercegovine V. broj: 397/2015 od 18.03.2015. godine, („Službene novine Federacije BiH“, broj: 24/15), Federalno ministarstvo energije, rudarstva i industrije je pripremlilo Informaciju Vladi Federacije BiH koju treba uputiti Parlamentu Federacije BiH na razmatranje i davanje prethodne saglasnosti u postupku izdavanja Energetske dozvole za izgradnju vjetroelektrane „Debelo brdo“ investitora privredno društvo KONCIG d.o.o. Posušje.

Imajući u vidu sve gore navedeno Federalno ministarstvo energije, rudarstva i industrije predlaže Parlamentu Federacije Bosne i Hercegovine da donese slijedeći zaključak.